

四庫全書

集部

欽定四庫全書

集部

茅簷集卷

一至三

詳校官編修_臣錢樾

侍讀臣孫球覆勘

總校官知縣_臣楊懋珩

校對官助教_臣陳木

謄錄監生_臣陸滋

欽定四庫全書

集部六

茅簷集

別集類五

明

提要

臣等謹案茅簷集八卷明魏學伊撰學伊字子敬嘉善人大中長子也大中忤閣被逮學伊微服變姓名匿定興鹿善繼家萬計營救不可得柩歸之後竟以毀卒世稱忠臣孝子萃于一門事迹具明史大中傳諸書所載亦

大概相近然學伊尚有老母而為無益之死
或頗疑其過中今觀集中與潘茂莊書曰追
比方始伊將就浙獄矣又辭里中父老書曰
目今公差來捉旦夕將死家門傾覆無可復
言然則大中沒後所謂坐受楊鎬熊廷弼賄
三千三百兩者所司仍追呼于家學伊積憂
積瘁于前積痛于後又重以閹黨之威虐數
者交迫乃無生理非真徒以一瞑不視蹈滅

性之戒故學伊之孝在于大中被禍之日竭力殫心蹈危履險出萬死以冀一生今誦其與人書至性惻怛足以感天地而動鬼神而錢士升等作序惟欲以隕身殉父稱之遂諱其追逮之事淺之乎知學伊矣其集一刊于錢茶茶大中門人也再刊于其弟學瀛是為今本學瀛頌其家聲論者不能以大中之故曲為寬假以此益見學伊之不朽由所自立

不以父蔭矣乾隆四十六年六月恭校上

總纂官

臣

紀昀

臣

陸錫熊

臣

孫士毅

總校官

臣

陸費

墀

堉

墀

堉

欽定四庫全書

茅簷集卷一

明 魏學洙 撰

賦

攄懷賦 并序

余頗覽流俗百憂繽紛竊不自知其何心也間於記
誦之暇糾察平生一簣方施規局覩撫衷俞熟託
徑俞寒余殆有私錮焉夫鑪冶既分資格斯剖狂者

恒樂猥士鮮懼蓋或區之非烝民能自為也昔幽通
抽緒于北地思玄蔚起于南陽大都借葩艷于前人
攄素懷之獨往冒臆自吐鬚髮可遺余竊訢慕焉爰
綴斯篇用鳴厥志雖非楚聲亦姑自廣云爾辭曰

嗟余懷之塊北兮勔襲跡于前修神旆旆以應縣兮恐
厥疹之弗瘳蹇獨行以亢回兮軼霧濇而影輶纏酷烈
為佩兮餐沆瀣為羞駕迅焱其溟滂兮曳氛旄其呼呼
飲蜚為余健芝兮造父為余持轡策我馬毋契需兮登

迴路之悠悠既晃朗以遐征兮下臨睨乎時俗相蔽井
之認認兮曾不可乎偕服競晚顏以蠱媚兮宵容與而
昕伏集衆垢于厲鄉兮寄生涯于詆譏黨人既以為常
徑兮恬不恧夫齷齪余不忍觀此恒態兮挽青天而慟
哭聊鼓盪以貢憤兮紛吾離此羣詢既詈余之眊眊兮
庚若憐余之寡就出門聞無人兮入蹇產而傷獨伴鱗
務以相饗兮孰胡繩之為淑宜蘋蘩之節離兮被回飈
之颼颼謀蘇世而特立兮又何病乎塊鞠忽中情之倉

兄兮歟堦前之秋霜氣沆碭而曾高兮天懽懽其不陽
道披離此芳藹兮頌揮蕭瑟而賈黃恫芙蓉之方茁兮
曾不及其芬芳豔鵲鵲之先鳴兮抑選時之獨後也羣
生各有攸當兮何良辰之不又也誕流睇以惻慄兮志
歔憾而難平傷庸夫之澀淒兮羣嗌喔而營營彼褐被
之曼著兮余乃譏譏與相迎必翫靡以追曲兮寧處廓
而無友生緬哲人之渠矧兮疇蠹沒而颺聲締扈理以
勿替兮惟茲瑤瑾與琇瑩繇邈其難虧兮瑾翕葩而

可帶荃旣淫溶溶其靡岸兮逝將葩焉以蟬蛻漫漫
弗裁兮懼一朝之狼狽獨不相夫迷涂兮洵沕瀹以滂
沛徒褰裳而無航兮固余心之所害意蛩蛩其弗懌兮
幾儻徊而自憐不可訊之厚地兮不可謀之昊天事沉
洄而好還兮何獨長此迢遰遡愍風其蓬龍兮埃埒埒
以湍旋荃瞞瞞而上下兮胥滔湯而弗遷余將與此終
古今曷禁涕泗之漣漣昔鮑焦之自沈兮偕務光而不
反聽燕市之悲歌兮白日慘焉其晬晚弔湘纍于汨羅

兮傷幽蘭之九畹步兵值窮路以號哭兮豈好言之可
輓彼焦先之枕露兮襲冷風之颼颼文詡之擊几兮戀
周道之阻修桃椎家乎世外兮伯倫葬乎醴丘若潯陽
之兀敖兮永嬉嬉而自由悲者莫可與晤語兮豈樂者
獨有好仇疾溷濁而莫遯兮吾聊與之媮遊雖歌與哭
其異徑兮余知其相對而長愁恨高風之邈邈兮挾昊
穹以俱浮余獨叢此坎毒兮當涉世之末流安得霜翰
之凌飛兮奄忽越此九州覽九州之曠漭兮余惘惘焉

誰屈或趨余以返轡兮勿踴涼以自隘如蟬翼之孑孑
兮疇頓步而可施衆微微其啞佞兮相態以狡辭被奇
服之攝葉兮衽旁挂而不可撓辟之九戎而索賴兮賈
用喪夫珍髮既紛蘊其黻鰲兮祗槁悴而見欺超迴軼
其猶莫兮戎乃輦輦而自私荃苟不識予之妙婧兮曷
羣喙而咥之更嫵飾以自暴兮長沉菴其何為繹行言
之媿媿兮幸來者之可諫先民各繽紛其成章兮何獨
樂此謠詛聊洋洋而為客兮侶鸞鷖于雛鷺雜筐簾與

鷄駝兮盛蔚華以瓊琤偕隴廉以同升兮何閭姬之可
言伊至人其藏器兮翫時故之相嬗苟余鼎其勿忘兮
孰沈冥而可賤觀周行之凌礫兮竊又愛此春華芳菲
菲其後茂兮教冰雪而揚葩睨亂流之澆鑽兮志悶瞀
而不嘉既紛員其波逝兮廬中垢而為家余將矯矯其
獨殿兮肯喪心而黨邪禹功未施于羸國兮厥躬靡焉
先自化上青天而無階兮憶江流而驟下兩驂釋轡羈
以馳騁兮孰云纖離之可駕強綦蹊以利跂兮尚恐恐

或未舍苟恣羹而吹噓兮眇不測其所赴嘗上觀乎西
山兮頻東陵與為隣展生介焉中處兮澹相羊以閭閻
右高歌之嘒嘒兮左鳩黨而割人汨滅歟余趨駕兮怵
餘波之相親寧槁死而萎殲兮誰嶮涂而可馴思和光
之緒言兮誕錯愕其驚神余既不克刈厥志兮又輜輶
以多牾不速速而擠臧兮將譴譴而取殫怛茫茫其憤
恨兮顧余幃焉瞿瞿擗窺俗以擬步兮儼鷄鷄之衝霧
匪中心之棼棼兮甯瞽天而無路將窮岑崑之歛崱兮

采幽壑之硃砂既礱礪以狝鬻兮復摩窳而聳牙紛顧
砥其龍嵒兮攀峭窞而咤嗟竇窈窕以無人兮殆猿雌
之所家顓嶠廓其奮晉兮瞰坑谷且焉躊躇聞猛夫之
栗舉兮侶螫螫而友玃腹巖窠之穿浹兮膺礪礪之怪
沙豈展狎夫澹岫兮諒坦夷于彼涂余既不難假遑兮
馭余陟乎高岡撐箴縷以為梯兮凌遊雲以為杭路曲
拂以傾晃兮石岳岳以相望仰重巘其嶄巖兮睇故道
而渺茫壁既峭而難駐兮力又竭而欲僵盼樛木其若

頽兮徒連蜷而弗將勉陟巔以偃息兮恍魂存而魄亡
世路既絕兮志遄歸而不可撫長松以迥眺兮身飄飄
其欲墮冰皚皚而凝霜兮雲霏霏而在下鳥磔磔其驚
飛兮霧濛濛而覆壑樹蓊鬱以茆翫兮刺羣蕪而聊舍
竊獨樂此異壤兮將往遊乎僊者忽淒風之騷屑兮逢
豺狼之狎狎虎豹駭而怒號兮挺敦旼而鋸斷爭駭駭
其相逐兮險淪碩夫厥身余竊覩此咆哮兮殊無異乎
今人中侏侏其怫鬱兮遭吾道以長邁下峭陁之嵯嶺

兮弄驚濤之滂湃鼓蓀橈與桂櫂兮翻翻此香馥
白蘋于江皋兮剪杜若而為帶波顛淡以泊活兮鴻蓬
涌而揚磕紛蜚壇其相糾兮蘭舟盪而濺濺既永去此
流俗兮載騁觀乎四荒沕崑崙之淫翳兮測尾閭之塊
茫抨陽侯為余先導兮御馮夷與儼佯雲湏溶而無丈
兮天澎湃而欲狂龍叩將圖以瀼穴兮忽革縈碣哭而
益將怪鯨為之屏息兮長鯨宵其固藏怒彪休以喧阗
兮意驕騁而不可降奔湍拍其相斫兮愁大塊之不長

曼余目以遊觀兮窺煙液之所積
森浮嵐之出沒兮疑風雨之窟宅
齊噴沫與頡頏兮挾飛瀾而滿
若水瀏瀏以寢駛兮石峇峇其
俞瘠此方意別有天地兮余永辭
乎局踖纚余楫以息征兮對蘆華
而為客枕頑石之嶮崟兮聽潮聲
之傍擊媿江山之浩蕩兮忘大寓
之迫迮倚秋風以長嘯兮聞木葉
之蕭蕭黥雲涌而上屯兮神慘慘
而弗驕懷美人于天際兮隔千里
之波濤鳥棲棲其慕類兮獸踴踴
而寡曹日悠揚以就暮兮送去瀨
之

滔滔辟獨羈此窮域兮傷魂夢之徧勞余將釋結絰以
宴娛兮又曷長困乎水臯量八裔之迢遞兮絙流峙而
靡控鷦明怯夫修罫兮應龍廩乎衡綬慙蜚鴻之茆茆
兮戾玄黠以遐班紛緯繡其弗可治兮長慘憺而增痛
憎蓐母之勃屑兮疾鴟鵂之熹哢祇居居其不合兮冀
弋獲焉靡中汎曾波之溶溢兮穿魁堆之幽洞詞纒纒
而永日兮覺乃悟其為夢神瞽亂以馳騫兮庸織路而
邁窮行不程古人之茂則兮將俛俛其焉從勿登高山

兮勿涉流水之冲融余初有成說兮展糾糾而可崇曰
孰董義而苦特兮疇珮仁而苦同蒸蒙之昧明兮曾纖
繫乎厥躬鳳皇翬于蓬階兮茂鳩寄乎苕叢爰翱翔其
各適兮覺區宇之矇矇眊彼黨之回適兮工嬸咿與儒
兒佻獨修此好顏兮蹇瘖瘁而忸怩余生耦彼仳仳兮
龜練要而自覲苟株繩墨以弗跌兮孰黥黥而汙之覽
稠木之颺芳兮亦各膺夫茂時無賤桃李華之穠郁兮
亦無妒喬松之後衰薰風不可數被兮孰枳塗而長治

賓時俗其過苛兮惡在葛天之可居聊怵怵以媮適兮
勿怵怵焉躊躇剪營營之蒿徑兮葺硜硜之故廬登連
連之葯房兮望蠢蠢之芷閭及余年之屈橋兮滋莞蕢
以扶疎幾俟時而充佩兮垂長衷之虛徐仰余陞皇之
赫戲兮俛余御夫夔魑彼諛謏之為薑兮余偕行而趣
趣借屨于埃垢兮甯庇景于華胥憂永路之坦坦兮不
愁嶮壑之沮洳願正策而孟晉兮長無負此居諸亂曰
流光迅徂汨前驅兮律嶮遙征勿踟躕兮十琢九置喪

良珍兮目長足短成凡夫兮高薄秋旻闕闐闐兮呷訾嚙斯
羣鵠鷄兮衆不可戶誅兮刻自振兮神灑灑兮將與天俱兮

離思賦

并序

乙卯春季家大人北之文安時序如流忽爾感烈離
思耿耿爰造斯篇情而不文亦聊以自據也辭曰

憶春陽之恢台兮擎垂楊之青青將余親于江臯兮忤
余行其岑岵數辟呬余頰詔兮逝將去此而遐征各慙
慙其弗懌兮中倉兄而難平陟巉巖以周覽兮覩大江

之滔滔道曼曼其靡極兮愾礧礧之怒濤恍齊魯之在
望兮迷颼颼之颼颼萍島汨其浮沒兮衝風動夫布袍
意徘徊而罷眺兮步徙倚乎彼陴勉商畧江山之奇勝
兮志奄奄其不豪載宿宿以儗裝兮歸者先解維乘潮
水之迅駛兮撫中心而不夷願及行之未遠兮更壹見
而致辭計淹留其終別兮強自割而遂馳道晉陵之殷
麟兮踰姑蘇之漫爛出新詩于輕箴兮喟數章而永歎
涕靈靈其若霰兮神溶溶而無畔馮惆悵以獨返兮羸

憂集而悵悵既傷兒之懷親兮重傷親之念兒戒歸櫂
令遄發兮還三復而眊之匪無則言以自壯兮寫中曲
乎兩眉孰有恨而非別兮孰有別而不思佯婆娑其媮
樂兮各不言而相知羌姜約以自廢兮憐風日之淒其
既駕檜楫兮臨迴道之三千歸期勿可道兮行遠繇乎
歲年肇發棹于吳會兮轄將弛乎幽燕邁女魃之僂舞
兮路迤邐而不前桃李標落以道盡兮榴火歆而復然
頃艾虎其縈懷兮又聞江南之采蓮跋烏不可與儷偕

兮艸木芸芸其屢遷傷征途之躑躅兮忽涕泗之流浹
石圻沸焦煙兮望錢塘而駐旆蹈赤坂之赫威兮塞傍
徨以賴跼欵慙慙其若撼兮懷余親而長嘅去衡泌之
肅冷兮服頑沙之颶塏荃不堪此蘊隆兮矧羈旅之狼
狽臆怫鬱以繚悵兮恒假寐而獨悽惓惓其承顏兮
或髣髴乎既歸盱余目而莫覲兮羌厭浥其漬幃每懍
慌以竟日兮留夢境而弗違雁翩翩南翔翔兮寄兒以
新橐憎世路之靈暄兮鳴吾鼎之為寶鱣鯨裁于螻蟻

兮虎豹吼而當道鳳凰翔乎天門兮覽九苞其猶未保
挾蓬矢無肅心兮徒傷謀生之艸艸兒願及年之方將
兮懷夜光而弔之薰椒桂與木蘭兮輯羽翠之陸離苟
善賈其可蹊兮將良弓以為箕出門遘夫文窮兮羣衆
兆而見嗤送裘馬于五陵兮什敝貂而自私天實構此
西山之局兮詎責獲之可為怵愁約以侘傺兮志遑遑
其俞亢塊獨處此窮簷兮倚斜陽而四望感嚴威之威
發兮俄飈涌以跳過女機杼而士嗟兮幸家人之無恙

日坎坎其育鞠兮獨有行乎四方俱昕夕而匪所睨兮
知永懷夫故鄉跂游雲以攬涕兮霑余袂其浪浪亂曰
人生孰無別離兮恃來者之可期幼不誦夫甫田兮曷
怛怛其相思

凜秋賦

夫安得陟高山之巔而長嘯兮傾壹鬱之肺腸秋氣蕭
索以嶢廓兮天地慘澹其不光山川為之改色兮百艸
替而焜黃余渺渺若有所離別兮懷帝子于瀟湘善乎

秦客之言秋也蒹葭蒼蒼白露為霜所謂伊人在水一方夫臨流有煙波之慨兮懷人虛秋蘭之佩徒悵望而無際兮目浮雲之黥霽淒其兮若紅顏夭折而遺芳寂寥兮若病子顛顛而相對願駕木蘭之輕楫兮汜涓涓之鴻波采江側之拒霜兮搴木末之薜蘿怨予美之不返兮抒慍愉而獨歌吁嗟乎蒹葭蒼蒼兮白露未晞安往非此凜秋兮悵悵恍其奚之撫枝條之菸邑兮被長風之颼颼吟王粲登樓之賦誦宋玉搖落之辭悲莫悲

兮寒鴉之哀逝慘莫慘兮夕曛之熹微當此之辰雖戚
儔嬉嬉其朋悅兮顓若惆悵而懷歸爾其銷離憂于壘
竿冀湛酒以怡情酒酣慷慨起步中庭仰停雲之偃蹇
聽孤雁之流聲覽籬菊之萎蕤憐當日之秀榮則又徘徊
徙倚慙惻橫生吁嗟乎人心不能為木石兮余將何
以為情

茅簷賦

閨都之北酒帘之西有扉畫局蛩吟鳥啼籬逕瀾迤詰

詘旁蹊臥板橋而如帶從樛木以扶疎繫小樓之容膝
卜素心而僦居愛綠綺之靜好懷青藜于古初可風可
月我圖我書每訢訢其欲笑吐幽葩而自攄入披翫兮
黃庭出窈芳兮蓀芷忽落英之盈裒驚茅屋之麗靡引
蓬壺之細流亦濺濺而瀾瀾啓紙疏以長眺撫女牆而
獨喜抱良辰之奇懷送行雲而如駛爾乃三復隰桑適
聞叩門或鼓荻秋之柅或攜楓谿之綸既風輕而煙暖
兼芋菽之不貧擷澤葵掇青蕲呼雛樹巔問酒鄰人悅

余美之娉娉舞長袂之蹲蹲競孟晉而迨遠導懿躅以
相遁于是衡門之下幽人儻佯敗瓦頽壁蘭香茝芳斜
陽小鳥遙林蒼蒼觸目懽賞便姍翱翔若夫拒霜霑亂
楓林標紅疎櫺自鳴切切艸蟲則乃放柴關泝歸澈上
高丘瞰長空秋旻曠兮沈寥杳彤雲兮無窮懷湘江之
浩沔駕洞庭之秋風思眇眇以遐舉覺天地之瓊瓏時
焉石瀨腹堅百卉實折日暖墻隈隴哀剩雪手枕殘帙
鷄衣百結短櫺無風酒酣耳熱又胡美乎寒江之瀟灑

寒山之嵒嶮消搖容與茲樂實奢蓬窻圭竇水歌岬斜
聽曉冰之響裂呀空谷之豁衍落霞孤鶩枯木寒鴉春
風蚤戾到我梅花誰歟居者或曰此伐檀君子之家

閒居賦

并序

余自解識字即志四方年既二十亦云壯矣乃足跡不
能徧千里而又客處以為常夫古人閉門讀書則有仲
舒遨遊山川則有子長悠悠閒居余何為者也賦曰

空庭晝永恬浪風驕秋深多慨歲暮無聊撫几席之優

游覽林樹之招搖感暇日之匪易聊攬物而逍遙其居
則柴門晃朗茨宇廢蕪盤渦浴鴨古壁纏蛛艸芳木榮
羅生室隅其木則綠楊榆莢青杉絳桃桂枝梅幹詘曲
嶢嶢其艸則苔碧蘿翠蘇紫茗黃淡竹青青菰蒲蒼蒼
其花卉則西廬斌媚菡萏清芬芙蓉幽麗叢菊繽紛其
書則陸藏鄴架出數米船蟲註鳥譯魚貫蛇連藍本麟
史艸薙狐禪其朋儔則蹣跚婆娑晤對汝我鎮日靜嬉
竟夕匡坐灑落斯臧方毅亦可其僮僕則蓬頭哭鬢短

衫蒙戎冥心塞舌儻屹倥儻漏深秉燭睡眼朦朧其樂
而遊則野袍翩翩駕言登高漪痕新長村郭輕刀歸來
揚揚鼓簧舞翻其風雨則輯楮糊窓展冊獨觀豁今日
曠寂兮意彈思入而親春風蕙蘭其雪則徧啓軒廡擁
爐兀坐颺轉霰迴衝幬撼座快劇欲狂憬頑豎情其月
則天空儺水堦白疑霜樹影蕭疎中庭四望偃息不能
長夜彷徨其攤辭則幼眇竊闕顯出涉趣執藉寒稍機
隨驚兔時采菊悠然時天潢倒注其飲則量齊玉局興

邁無功慙浮蕉葉勇涸荷筒赧然獨酣茅閣從容其歌
則慷慨激昂馮弔曩事伉直逢顛佞諛獲志朗嘯當哭
徘徊不置其勸而夢則予于徐違風就日娛境屢遷
任彼紓疾或平濤涵湟或層嵒巒嶸或淋瀝甌甓或從
橫璚琚或青藜歆爛或赤松授術或結趺少林或攜登
太室其遽遽然覺也則短檐不埽敗檣數椽鄰雞樹鳥
景物依然于是悄然作而歎曰雲移莎岸天覆晴川矯首
遐眺風光去年勝衣若干淹滯江南遲遲長日誠何以堪

定志賦 井序

書曰詩言志班固曰賦者古詩之流也夫余遨墳典
之園遊先喆之衢舍魯奚適矣顧衆兆馮生各有攸
驚根柢未定見物斯遷思以纂至人之餘徽繕厥初
之貞性是北行而南其轅也必不幾矣老子曰不見
可欲使心不亂蓋亦自閑之善策與雖然土之塊然
也遇水則淫膏之澄然也遇炎則沸程伯子之喜獵而
復萌于十二年之後也不見其可恃哉陸行而語人

曰善沒善沒無徵也浮江河而不波則真善沒者矣袖手而語人曰竒勇竒勇無徵也舉九鼎而不礮則真竒勇者矣尸子中黃伯曰余左執太行之獲而右搏雕虎惟象之未與吾心試焉試云者蓋假以自徵者也余故騁辭乎滔蕩之場肆情乎荒唐之域窮態極變嗜慾畢陳明晰者惛眩貞確者淫放忽忽欲身試焉已迺收其佚思返乎芳躅澹然無營屹乎其不可移斯以為定志之章習非吳粵水亦不可浮也力

非責諸鼎亦不可舉也志定于既試之後者君子所以可輕試也志定于未試之先者君子所以不輕試也孟陬之旦抽斯言以為繩余其不摯勵焉其辭曰歲協洽之始旦兮氣凜冽以淒淚雪霏霏其颺曳兮風淙淙而鳴厲庭木菸邑而無色兮春陽其猶未戾相烝族之嬉嬉兮各怡懌乎改歲輪蓋岵岵其雲蔭兮閭閻聞噓而陰堅士篋裘馬之劇觀兮女飾媮靖之纖製笙鼓嘈雜而狂會兮粉拱翕施以增麗彼時俗其固然兮

亦良辰之可憊忱邑邑余紆軫兮獨鬱結而歎懽攝提
遷以遄邁兮汨赴阪之迴湍昨總角而象舞兮俄岌岌
之高冠豈不諒晏虞之為適兮時曷可乎久盤昕皇皇
其遶柱兮夕抱膝而永歎叩前修以內慙兮增烈烈之
重寒彼駮駟之咫尺兮夙雄眇乎千里干將脫劍而契
鐵兮曾何需夫鈍砥禹龍躍而雲湧兮瑜虎嘯而颺起
寧華髮之墮巔兮忽剡鋒之迅駛昔魏武誠鄴城兮道
頓丘之無遺矢雖嶮夫非攸慕兮已森森堅其壁壘豪

傑各有所締構兮疇不孟晉而惜晷洛菲躬之溝猶兮
足踣跼而不前覲瑋迹而婁奮兮怵長路之縣縣曰嫫
節其可好兮羌發軔于髫年窳氓奢覲而桔耕兮莠驕
驕于甫田糾余生之步履兮洵重誑而馳讐辟仄徑之
幽隘兮杳窅而不覩天翫媚俗之追曲兮羣踰踰以嬋
嫫文好顏以為媼兮匪余心焉攸便遂肆志而橫驚兮
教廷頹而不遷謂彼原我獯兮蹇宜邁此述遭盍反性
命之眩渥兮我與彼其俱然湛芳蘭以鹿醢兮越三年

而易馬或厥根之漸滄兮僉委寘于中野吾誹蘭之不
馥兮豈芳艸之尤也謂九畹可勿樹兮充幃之羞也滋
德行以竣楸兮願及年之方華辰漸冉其逾逝兮愬霜
雪之浸加寒余悄急以成性兮羌心疾乎浮夸任鵷鷺
之孑孑兮瑜不琢而為瑕繁弱之洞堅兮資排檠而體
正儀狀曄其齊觀兮庚增飾而俞靚竇前詰之不羣兮
聿矻矻其抗精疇怠荒而隆伐兮孰消搖而躋聖豐壙
堯下兮恐行潦之隄崩荼林淺根以浮埃兮焱風吼而

上仍蒙鳩編髮以為室兮奄焉喪其所馮馮生總總其
靡定兮展余心之所懲余既懷此眇思兮冀霄焉豁其
蒙蔽修途迢遞而亡鄂兮余乃夢夢其未睎紉留夷以
為帶兮緝胡繩而為悅願衆芳其繁廡兮逕蔡莽之螫
廁茲咫尺吾弗曙兮矧出門之數蹶焉猶夷而廓處兮
將謏謏以永世誕周流覽觀以財擇兮余乃知吾所憩
脂余車于家巷兮秣余馬于道周亂余輿兮容裔攬余
綵兮夷猶神猓猓以惚恍兮行極目乎中州睇闐闐之

罷擾兮各營營而有求津要襍沓以叢穎兮紛勺灑
其綢繆焱焱聲燄之煇赫兮訇訇轂轍之殷稠遭時而
適志兮競侈侈以忘憂聳層臺之將將兮駢雲屋之爛
爛蘭橈埤堦以交錯兮桂棟曼衍而炳煥飛檐嶧嶧其
矯起兮彤軒爽塏而皓旰絳雲斐亹以翼櫺兮杲日射
疏而粲與砥室繽紛其致飾兮琦璜雜璘珉而零亂目
迷青蔥與蘋素兮曾莫殫其珍翫美參霄之臺榭兮又
羅花木之芬芳薰風習習其拂袂兮桃李爭艷于春陽

憐芍藥之妖麗兮佩蕙茝之幽香
栝榴噴而然堦兮沁
菡萏于池塘夫容綽約其臨流兮
菊英矯潔而凌霜梅
抗雪而揚葩兮百卉不敢與詡
胡周亭渚而徧眺兮
爛菲菲其流光余聊紀夫嬋序兮
展更僕而不可詳既寒
攬之娛情兮又杯竿之好合
淥醪斟以醺酢兮蘭肴烝
而迺還熟熊蹯之鮮臠兮烹豹胎之煜爚
旅臠螭及肥
腴兮兼炮羔與雞臠揉黃蘇與露茹兮
調葢羹而先鶩
蠡醪醪其蟻浮兮分牙籌而司酌
衍芳顏之微酡兮忽

女樂之雜噉芋瑟淫淫其繁會兮賁鼓震動而叢叢新
聲參差以迭奏兮謳與歆而交囂衽褊褊若交竿兮樂
妙舞之翩翩華袿飄颻其從風兮羅襪蹁躑而逡巡儵
鴻翥而鳧沒兮曳蘭綯之糾糾歌與舞既酣悅兮客酖
醕其徑醉蘭膏熠燿其逾明兮紅妝陞坐而無次嫫眼
眇其騰光兮聯曾波而遺視雜杜若于輕裾兮握纖手
之芳膩眉連娟以繚繞兮腰嫵妙以佻媚申厥好于九
秋兮勿渝情以遐棄魂忽忽以搖蕩兮孰桑門與展季

窮聲色之湛樂兮羨滄海之無期聊遨遊以愉快兮俟
河清乎幾時余聆茲靡靡之瑣說兮忽亢志而長思初
旦旦有成言兮曷回畔而自嬉不見金谷之遘禍兮誰
樂極而不衰士幼服先民之炯戒兮咸敦勗以自持出
艷繁華之可者兮意默默其寢移朝愍黨人之湏沒兮
暮褰裳而就之還訕介士之特立兮長顙領其何為曰
吾豈涉而遽汨兮聊與之逶迤醉夫自為醒兮旁觀羈
然而相嗤余不忍厥躬為嘗試兮夫安能乎留茲遭吾

道以遠逝兮正余策乎徂征僕夫喃喃其詢諄兮馬裴
回而不行既舒節而遂晉兮相余心之所明苟蟻蠊其
可浮兮詎駸駸乎丘陵枯槁匪足尚兮亦云企夫修能
去琢蠡之既遠兮將俛俛其焉憑歷闔闔而諦覲兮余
馬且焉止息何土習之壑慄兮云游俠之所域好傾身
而締交兮集輕詵之奇客美賓從之萋苴兮張威聲之
赫奕冠劒紛紛其從衡兮珠履晶瑩以千百鳩俊桀以
巷飲兮笑肝膽之不隔雙耳熱而長嘯兮須髯豎而如

戟或尋幢與扛鼎兮或投壺而呼白既蹴踘以湯戲兮
又分偶而拊射窮鄱陽之暴謔兮輕千金之趙璧攬於
菟之重裘兮橐籥門之烏號左夏服之勁箭兮右步光
之霜刀縱晨風以馳獵兮燎千里之蓬蒿颺礫飛而蔽
天兮豺狼驚而怒嗥氣歆勃其不懼兮拉彪飈于窮臯
踏深雪而夜歸兮呼美酒而烹羔躍馬顧眄兮誇一世
之雄豪召屠亥使麾鉞兮呼漸離使擊筑倉海忽其礪
賊兮慶卿因之痛哭持牛炙而啗政兮解佩劍而贈育

朱家嘻布之髡首兮要離誚訴之眇目招原朱于二陵
兮各意氣之相逐忽中宵叩門兮號胸臆之不平柄人
哮闕兮姦人猙獰戚人肆毒兮生人食盟中憤憤其憑
怒兮訝烈焰之橫生彈丸發而巨讐殛兮杳莫跡其姓
名抑恂恂罔德色兮沒齒而不自鳴嗟夫人之慷慨兮
殆燕趙之風也亶滌滌其磊砢兮然狙獼之雄也睚眦
蕞芥兮忽肆諸路隅交游罕擇兮禍發于錙銖萬乘恣
其凌轢兮悲厥終之可虞馳余輿吾過發兮羌去去而

弗顧士趯趯以跣弛兮鮮不軼乎常度壹睎盱亡檢柙
兮良古人之所惡志怛矯以亢厲兮覽八極而尚羊曩
蓬矢之俶縣兮肇有役乎四方長湛鬱其弗舒兮偕秋
艸而萎黃超拂拔以遐騁兮牧余駟于遑場戈鋌林立
以彗雲兮旗旒飛颺而拂蒼散貔貅于虎落兮聽鳴鏑
而夜愴彼越甲鳴吾君兮竊憤醜徒之跳踉壯夫生而
燕頷兮死馬革其奚傷震鬱怫以渫怒兮目閃爍而揚
光吾願上關威弧兮落曾玄之櫬槍戲下煦煦其挾纊

今又慄慄如負霜士魚然而鏖戰兮曾莫抗其顏行鯨
鯢搏以成觀兮豺虎讐而摧藏垣墉絙于雲外兮逼威
名與俱長帝赫赫詔入闕兮奏膚績而肆觀閣棘傑僂
其前列兮鉦鼓嘈囀而雷振猛士騰躍以彪悍兮玄虬
沛艾而奮進佩長劍之陸離兮肘纍纍之金印天子嘉
乃成烈兮躬敬勞其懋蓋玉歷頒于白蘭兮薊賓懾而
內賁東震日域之景國兮西壓月窟之末胤陋驃衛之
犁磔兮祇黷武而開釁虎賁罔所庸鞭撻兮屹長城之

坐鎮余既難夫橐餗兮展永慕此崇功意飛揚不可以
戢兮恐性行之曹曹毒龍矯其上騰兮海水沸而洶溶
肆虓虎之跋扈兮漫躑躅于西東憑不顧夫置爵兮奄
抱慟于良弓或蒞醢之幸脫兮引猿臂而自雄顧桑榆
之夕景兮忽回首而長恫東流逝以不返兮悵偉伐之
俱空壯心頽于麟閣兮託遠想于喬松旋余輶以徂往
兮竭栗然而曾舉棄經營之擾攘兮求真人與之語願
令介鳥前驅兮為通言于玉女意眇忽其臨雲兮望三

山而延竚朝余發于中土兮夕余稅乎丹丘羽人踟躕
其成羣兮絕雰埃而宣遊郊神明以高厲兮朋精粹而
為儔播蜺蟠之離離兮總虬旒之浮浮攬慧光而為旂
兮揭招搖以剗流掣列缺之淫裔兮駕飛廉之颼颼望
舒瞭皎其騰輝兮豐隆砰礚以彪休卬旬始其密邇兮
尚神達之可摻怒戴勝有倂懷兮合羣僊乎好會將祝
融前效軫兮詔鈎芒使展軼蓐收跼蹠以樹旗兮玄冥
狂趨以絳蓋紛紜鏗鈎轟以軻軻兮雜選轆轤隱以硠礚

烟煴曄曄闐以飭兮騷瞿眴錯以賴頭騰驤迭過
瞿以趯踔兮躑躅叫弄轟以溟霈青虬赤螭蹇其天矯
兮芬芬衝從以奔駢忽清霞爛煇其異采兮迓僊侶之
雲從揖岐伯暨偃佺兮跼羨門與韓終邀桐柏之王子
兮攜南嶽之赤松既招方回于五柞兮又迎葛繇于綏
之瀛誰卷卷其緝御兮候金母與木公賓翩翩交集兮
於茲焉舉觴屑瑤藥為餽兮榆瓊靡為糧吸沆瀣為餐
兮斟玉醴為漿漱飛泉之微液兮咀石菌之華英列如

瓜之巨棗兮采木禾之芬香
眷明光之媿媿兮咸欣欣
其樂康賓既夷悅兮於茲焉
式儼拼湘靈弄瑟兮使馮
夷擊鼓子晉吹洞簫兮青娥
為曼拊叩昆明之曉筑兮
彈雲璈以琚橈歌太霞之妙曲
兮裊餘音之縷縷眈清
都之節族兮長無極以終古
余竊樂此眇界兮迥異乎
曩之所陳聲色沉濁以冶湯兮
茲獨沕穆而渾淪心泮
泮其浩曠兮憺委佗以怡神
駕白鹿余濯髮兮乘黃鶴
余晞身載青鳥陞閭闔兮
狎紫鸞之馴馴登閭風又微

閭兮儼無始而為隣餐六氣以遐驚兮焉能經與鳥申
驟噫鬱余悵悵兮悲滄桑之數變木羊躡而一足兮紙
驢碎而成片石橋梁灑以灑沫兮銅柱坳圯其如綫紀
崦嵫與暘谷兮經咄嗟而忽徧竊聞令威歸遼兮蘇眈
返乎故鄢屋廬夷為鹿場兮椒壁荒而存壁白楊蕭蕭
其嘶風兮枯柏陰翳以連卷髻豎彎弓以彈射兮爰飛
鳴而悲吟展悽惻其若茲兮又何長生之足羨徐生入
海兮五利以為師攀龍髯之蜿蜿兮射魚鬣之𦇧𦇧雞

夫不獲偕升兮辛賢聖之見咍豈徒謂其尠成兮缺心
咎其貪癡道坦坦其平廣兮罔喬怪以炫竒靈臺渥滑
以不守兮胥日用而耘之余焉庸此詭誕兮祇貿貿其
狂馳沂蓬壺以迅征兮策余服乎吾將反邇有伐而難
循兮理有訛而匪遠羌昕夕與食寢兮余乃袞驚而旁
遁速黽勉以遵路兮趁曜靈之未晚既律崛其遄歸兮
弛吾轍乎故閭彼紘紘祗攬心兮冲舉又夸虛攝浮氛
以復正兮屏萬慮而獨居束汎剽之纖慧兮信印志于

古初羌焯掌而權精兮密追琢其璫璵逢萌視恐或賈
兮敢愒慢而趺諸螾罔爪牙之犀利兮穴槁塹而為居
蟹二螯又八跪兮顧曾螾之弗如余乃寤夫繕修兮厯
夢寐之拮据椽中貞為基兮葺禮儀為廬築沉深為冥
兮豁神識為疏塞憔悴印弗憚兮跂往聖之高衢慙余
質之凡鴛兮單千百猶未迨望平原而勇趨兮猝遭躓
于崑崙意蹙蹙若有所懲忘兮忽又事去而忘改漫搖
筆以雄視兮矜文章之五采綜綺縟之粲粲兮映冰壺

之皚皚啓汲冢及西巖兮固菁華之所在漱羣芳之津潤
兮振麗藻而竒侏頤墳索以誼形兮雖蓬垢其弗悔謂
顓顓喪厥志兮戎相尋于罔殆閔醢雞而發覆兮徒與
鼃乎語海余願斂華而為實兮先樹本以為華扈尼訓
之睢睢兮株繩墨而不柰剪蓬艸勿繁翳兮俾昭揭于
坦涂循茂則而忽悟兮超永逸乎澁窪曦皦皦其中天
兮何隨侯之照車堅卓犖之貞性兮又善劑于中蘇剡
靈光其內葆兮允融洩以婆娑亡憤疾流俗兮局蹐為

小儒蝓蝓曲以局身兮蟬戢翼而長臞彼鸞鳩之譏陋
兮惟榆枋之與俱勿恢張蟲伎兮凌厲乎九區鳥惡美
羽句啄兮魚畏哆口而垂腴憫文豹之來田兮詎華采
之不殊鳳凰翔而翺翺兮應龍陟皇之赫戲闕芒芴以
隱見兮妙變化于有無瞻羣族莫絜迹兮諶印志之攸圖
笑夸父之捷步兮堙瀚海而搏塗矢余願罔卻顧兮羌
弗病其為迂亶厥躬無離訖兮吾獨征乎又何需歌曰
風颯颯兮薄寒雪翁翁兮萎柯偃辰光兮迅邁蹇蹢跚

兮蹉跎閉衡門兮浩歎疚余心兮實多載歌曰遊思盪
兮激印偃跼踟兮徬徨涉嶮谿兮愴怳眊經塗兮周詳
誰與余兮同好余將往兮褰裳

茅簷集卷一

欽定四庫全書

茅簷集卷二

明 魏學洙 撰

詩

猛虎行

北山有猛虎不牝亦不牡哀哀無辜人吞噬十而九猛
虎且勿道蝨乃伏其尻壯士困顛躓蝨喙紛相撓憤語
行路人且復忍此蝨撲蝨誤驚虎滅影苦無術虎頭置

短枕虎皮罩塵埃猛虎有死日蝨乎何有哉朝窺北山
頭猛虎死耶非暮窺北山脚猛虎死耶非獵戶不見至
虎尾日鮮肥虎尾偶一掉蝨失尻間竅

呈鹿太公一百韻

赴難趨燕市潛身向范陽日斜懷劇孟風古邁羲皇跂
德投村塢涓心拜艸堂道顏面渾噩高誼薄穹蒼諒直
衷無滓端凝動有坊格言森榘矱樸性愛農桑俊傑尊
冰鑑鄉氓敬彥方典刑黃髮備碩望白眉良暉煜精神

湛繇延福祉昌使君當日政吳國到今揚封事傳金匱
遺碑匹汜鄉烏衣矜世胄白恰故鄉裝韻叶芝蘭靜門
流苻藻香愉容齊醴酎正骨賤膏梁霈澤中為滙鴻波
衍愈長赤駒噴汗血紫燕曳晶光介節驚闐闐英聲震
廟廊叩堦爭內帑仗劒出危疆齒嚼謀逾厲髯掀氣自
昂矢弧誇飲羽旌節詡懸狼猛志匡中葉雄心蓋大荒
參雲鋌棘白照日旆旌黃痛飲喧軍倅歡歌入建章此
心靡敢懈多事許承襄翁本千尋幹堅同百鍊剛詒書

休念父努力只勤王日月銷兵氣星雲耿夜芒平生交
砥淬忠孝勉勵勳鵬鶚無凡轂長離又獨翔奇文卑藻績
寶色炫琳瑯萬國推冠冕千羣憚頡頏異才輝燁赫王
父憺徜徉熾盛追攸始逡巡謝弗當蔣瓜循別墅占黍
候方塘藹藹祇如舊源源方未央曾孫肩遞亞穎質璧
成行跨竹寧馨子擎書窈窕郎探懷尋棗栗得餌問餽
餽倚膝身何軟牽鬚吻欲張互嘲頻咄咄逸去更洋洋
樂趣茲為極愁端總可忘健軀兼矍鑠砂磧恣趨蹌騁

馬恒辭鎗闕弓不避強豎標真迥俗作戲亦逢場疎奕
隨清簾高謳侑巨觥東遊期泰岱南眺夢蘇杭卓犖談
名勝飛揚羨裏糧絲來垂宦橐一意事田莊負雪靈椿
勅臨風玉樹芳旁觀咸色動語次却神傷自歎衰頽日
常依慈母傍視陰催食至撫背訊衣涼母子互相察晨
昏習以常弄孩紛蹠蹠怡老巧相羊五世驩焉聚百齡
穩可望潘輿俄息駕陶幕掩空房境熟疑猶在悲來悟
已亡含辛收拄杖拉淚對匡牀聲咽堪酸鼻余聞更斷

腸蒿憂謫罔極莫算詎為殤怪事憑空降吾親胄世殃
觸邪師虜角構禍起貂璫緹騎奔騰出檻車竭蹶忙隻
身羈犴狴酷暑困桁楊大命危于綫嚴威灼若湯九天
終靳露六月決飛霜生子庸如犬窮途狀似獐腳疲空
踣躅昔爛尺傍徨慈訓潛相怵戎心惜莫量破巢憂殄
滅廣柳速逃藏艸字模糊半愁腸次第詳南行情怛怛
北望涕浪浪兒已尋安宅爺誰送水漿無人與我信有
眼總如盲魂蕩渾難繫形枯迫欲僵人生徒縮朒惴死

亦羞惶長者興憐憫高言發慨慷輿情爭忿忿天道豈
茫茫共諒身如璧何愁舌有黃螫深今且散氛盡轉成
祥解絆馳騷裏開籠放鳳凰千年虛射塔七日莫依墻
死孝從無濟艱貞刻自將孫嵩欣寓趙張祿怯逢穰逕
僻稀行旅簾開得左廂拯危情激烈排患語鏗鏘幕雀
人爭鄙池魚衆屢防丈夫別有異長笑謂何妨架帙紛
紛啓園葵款款嘗暫行呼廐馬重到授衾囊見我纏淒
楚更端引悅康銘恩何可報拊臆不勝愴老父娛家巷

先生泛野航斯言誠獲踐小子劇能狂濁酒乘新舸輕
帆掛短檣遍穿薜荔洞亂舞芰荷裳事過驚疑伏時平
志氣颺浩歌摧下里苦調帶秋商燕叟英雄槩吳山艷
冶妝啞然供一笑跪進介眉觴

和陶飲酒

庭菊無俗韻好風徐拂之澹然獨自遠想見東籬時吾
骨本無媚爾亦恒如茲霜白花始黃高卓良勿疑對之
冷人意得酒欣相持

二

偶步短簷下淡雲如遠山變幻斯須間玩之欲忘言柳
青菊花黃樂饑以長年優游苟能爾奚用百世傳

三

志士有奇懷何為翳吾情吾身如聚沫所寶匪榮名但
問寓世間奚以了一生秋風隕枯葉慄慄心自驚時駛
不我待淹留欲何成

四

夕陽在楊柳黃葉依風飛我心匪傷秋不覺心獨悲
慷慨向前行動念多所依長道眇無界究竟將安歸
中秋發長嘯一嘯百念衰但得此中樂百年願無違

五

鄰家有新竹日夕百鳥喧更有古梅花植我西北偏
啓窻與相向幽幽同空山朝看樵豎來暮看樵豎還
似得古人趣有意未敢言

六

束裝駕言邁未知向誰是此中有真辯而不關譽毀斯
道大路然驅車獨行爾冷煖還自知今人自羅綺

七

古哲有餘芳我將餐其英相遇殘簡中欣欣如有情父
子理團蒲得酒相與傾小時解成句今復聊自鳴詩成
無所為下堦秋水生

八

松性本孤介落落有奇姿萬木凋西風了然聳高枝何

如茂林中舉俗忘其奇披霜秀孤嶺松亦何樂為歎昔
風前花狂蕩不可羈

九

枸杞生庭中秋至花始開銜杯與之對悠然有遠懷輕
雲任往還與心了無乖有詩常高歌無山亦高棲天地
亦云廣焉能隨塗泥流俗性所選還問心所諧思路各
有熟習慣成行迷吾行猶未遠吾駕尚可回

十

忽忽有所思乃在天一隅豈敢憚阻修去去登前途
騷裏猶不疾揮鞭冀長驅向謂萬里長萬里更有餘一朝
寤馳逐轉盼歸其居

十一

嫋嫋吹西風秋艸紛長道幽人方著書青山未應老得
句小窻前書我自嬉稿優游意無窮每念獨居好不飲
亦欣然吾志以為寶臨風一長嘯餘聲散天表

十二

閒居何所樂不語匡坐時每遇點頭處有解無言辭安得方寸中息息常如茲微光露餘隙一動仍復疑暝眩疾乃瘳古語不我欺露盡放明月旦暮或見之

十三

讀書荒寺隈居止近人境身在糟醕中未敢傲獨醒矢志程先民邇言或不領至人能斂鍔余乃無餘穎安得一豁然明月與同炳

十四

離索亦已久好客相與至濁醪飲前庭主人獨先醉風
日恬以愉隣竹亂行次每念佳會難沉酒非所貴禮肅
意乃和相對有餘味

十五

秋風亦云厲槁葉盈我宅黃鳥無餘聲玄鳥有遺跡嗟
我何規規敢憚千與百秋深氣微寒秋盡雪將白誰不
悲流波當前莫能惜

十六

問余何所好所好在六經不作亦不述好古未有成笑
彼百家言戛戛紛所更驅去弗復覽閉門書黃庭滴露
小窻前好鳥向我鳴此際意無限處處深有情

十七

斗室小有天空庭小有風遶榻置青箱坐臥古籍中一
葉墮周易知與前林通蕭疎秋樹間茨屋三五弓

十八

瓶粟猶未罄村釀或可得安得陶淵明就我解我惑看

我篋中詩介然去茅塞借屨醉鄉中同行歸樂國先生
故寡言余也願偕默

十九

頑隱恥泉石鰥官恥榮仕當余無事時世紛孰纏已胡
為俯仰間赧赧亦懷恥遡風一登高秋思幾千里天地
一何曠渺茫官無紀苟不與之然墮落無底止所恥其
在茲日月曷敢恃

二十

時俗競工巧繪畫喪乃真自從解啼笑渾沌失其淳江
河日趨下衣冠日趨新每逢桃花開慨然思避秦舉世
汨泥塗否亦隨飄塵烈士懷苦志自立良辛勤陶令起
晉季樂與遺蹟親飽歷餒與寒意中常津津詩成倩友
錄酒熟漉以巾先生古遺樸渺渺羲前人

野眺

天地亦奇艷縱橫桃李花人聲響寥廓雲影渡村家

有客

有客有客何亭亭翩翩辭我出我庭舉頭視日日未暮
行行重行還復停槃桓斯須故人好匪有遺說相丁寧
城西渡頭獨歸去垂條萬縷江天青

田父述

田父昔云壯而今亦衰老耕男荷鋤行語我莫起早獨
眠鳥聲集啓戶日杲杲簷瓦浮輕烟久霽今乍好

二

炊烟起前村念我耕男饑入門促婦盪語罷還歔稚

子囑鄰家勿濯菱花礪隴頭直南去疾行還疾歸

三

槿下犬迎吠遙識南村友殷勤乳下孫先我亂趨走久
別勿言去恰熟新釀酒解籬擷園葵攜壺向高柳前宿
君家時共醉值隣叟茲翁故矍鑠日來安好否

秋興

時同社競賦紅葉

菊花當牖酒當簾楓樹當風動遠帘紅葉有詩追白傅
素秋無事獨陶潛十年夢境留天壤一夜溪聲到艸簷

此日登高賦秋興歸來蘆畔月纖纖

二

相對柴門月欲芽秋風吹徹舞衣斜閒披晉帖裁新葉
倦枕韋詩數落花不嚮暮園憐蕙苗每逢流水憶蒹葭
浩歌獨擬滄浪去蓼蕊蘆枝別一家

三

天高着處可徜徉日日優游日日忙瘦菊倚風同客笑
短簷搖影共人長舊疑西蜀詩無律近信東臯醉有鄉

薄暮憑闌清眺迥水青雲白淡秋粧

四

秋氣蕭疎秋思閒出門跬步屬塵寰藏身未得名山勝
避俗獨來高樹間聞道古人攜鶴去也應今日放歌還
幽懷不盡凌波興且抱漁竿水一灣

五

日出看山日入回道逢曲徑更徘徊啾啾細翮攢枯木
裊裊游絲下絳苔野菊偶開秋色裏奚兒莫報主人陪

茶鐺好逐漁郎返蕩槳高歌歸去來

六

片帆斜入荻花洲笑指西谿話舊遊曲水樓前留我在
遠雲飛處有人不村翁來往逢歸徑稚子踰蹊上釣舟
茲日幾山同眺望登臨遙憶洞庭秋

七

何日青錢買釣磯秋江短櫂任飛飛好呼巢父為隣右
或伴堯夫上翠微芒屨每逢佳石住布袍常拂暮烟歸

脩然此意誰能畫晴浪無聲落葉稀

八

一夕西風到畫欄芙蓉消瘦不禁寒身無同調人應笑
坐有新詩眼倦看逐伴未能忘禮褻閉門聊自愛衣冠
晚來斗酒長吟處月小天高白露溥

乙卯春大人有文安之行送至京口大人用楊柳
青青渡水人為韻賦七絕以別敬步原韻

奔流去不息離愁方未央江南望江北煙裏見垂楊

二

平時不解懼臨別思聚首無計繫征帆傷心道傍柳

三

波白連天遠登高傷客情來朝芻馬處西北暮雲青

四

分手經年別難教離恨輕秋鞭如可整燕艸尚餘青

五

時序屬春深世序屬歲暮相將了蠹編同訪桃花渡

六

渺渺萬里濤風疾亂帆駛惆悵對金焦愁心滿江水

七

歲歲饑驅出慣于僮僕親幸聞帝都近頻有往來人

茅簷雜詩

只在塵寰內居然徑獨迂此君疎類我石丈老于儒候
雨迎鳩婦栽花雞鼠姑客來深自耐知有濁醪無

二

吾廬何所托芳艸蓼花西
幻豈漁郎路悠然樵父谿
落英行處拾佳句半無題
莎邇時來往苔深茆屋低

三

獨坐不知夕時聞棲鳥騰
閒情懷應物淡語憶淵明
近借隣家棹前移柳下甬
道逢田父返相話豈花棚

四

來往曾何意偏於淡處親
山光疑舊夢花影屬分身
曠眼侵雲脚沉思傍水湄
平生最相識強半白頭人

五

獨坐寒梅下依依細艸薰耽奇追鳥跡消懶學鵝羣詩
入花間隊文成水上軍朝看司馬賦恍欲上云云

六

孰謂貧多暇箋詩更解玄業隨當代後癡到古人前瓶
滿陶潛粟囊餘杜甫錢願奢誰過此老我只丹鉛

幽徑

曲曲穿幽徑花光映艸鞦水天何淡蕩烟月好沉埋路

轉鳴琴處依然畫舫齋閒林風景悅使我易為懷

二

焉得無人境圖書雜鳥魚蕉花釀雨露桐葉譜居諸舊
伴攜孤鶴新詩掛塞驢睠茲渾欲舞身履定何如

病中喜沈子玄仲操兄弟見過

纖艸萎牆側微霜薄寒柯有客來遠方羣集酣且歌匪
我新釀好語洽歡情多病子不能偕惆悵當如何

二

金夕已月二
卷二
披帷見餘照疑是月光感茲不能眠攬衣獨傍徨索
居思遠人邂逅不得當從君乞諒艸使我心彌忘

贈子玄

偏得伊人意吟攜月下鋤稻香通竹塢新句幾躊躇

日晚歌

日垂暮兮閒眺下庭堦兮遲遲攬秋芳兮可愛撫黃菊
兮彼陂枝扶疎兮瀟灑紛英英兮陸離菊逢我兮暇日
我逢菊兮茂時澹相對兮逾好茲逍遙兮無期

二

月娟娟兮初生日淡淡兮餘曜當茲辰兮有懷倚柴門
兮永眺彼漁父兮何為支兩膝兮垂釣夕陽盡兮忘歸
臨清流兮自照襲芳艸兮相盼余與子兮同調欲有言
兮無辭覽前林兮微笑

春晴

短袷狎輕風簷牙映日紅水流殘雪外家住鳥聲中柳
怯顏宜笑梅歌韻特工故人春倍好應訪百花叢

往楓谿看梅經梅花道人弟園址

道人吳元鎮字仲圭自號梅沙

彌

從此西行去春風處處花沙彌留碣否亂石擁殘沙

代簡答友人問舟

大雪撲空下兼之失輕舟咫尺困沮洳停雲思悠悠一朝曜春暉欣欣動生意鳥啼雞亦鳴堤楊發新翠舟失不復歸沮洳已平地三復杖杜章濁醪願同醉

宿荻秋庵水閣

夜半溪聲到枕邊
數行哀雁落青天
依稀酒醒殘楊岸
冷月秋風繫小船

二

斜枕殘書秋水邊
數椽如欲傍青天
黎明驚喚斜塘去
隔浦漁家盡放船

遊秦駐山道上口占

匹馬踏殘陽乾坤亦渺茫
海潮東去盡行子但愁腸

訊京師歸客

昨夜足拳三尺鐵長安馬上髯如雪忽聞人從長安來
披衣不待柴門開紫裘半醉別燕市家君可有家書裁
吾知書中不得意小鳳霜折搏風翅客囊羞澁布袍單
紅簽逐套平安字寫時雁渡湘江水到時水落芙蓉死
便令歷歷道分明往事蚤隔三千里天長日短歸不歸
愁心亂逐孤蓬飛

作客東門行

悼衡兒作

作客東門歸舍中稚子牽衣嬉行行去去遶膝不相離

阿耶抱兒兒不願啗果與餌兒慙嬉母傍耶開側扉去
舍中稚子呱呱啼啼出大門啼入室幃四望弗見伏泣
不能止一日不歸三日兒病五日死兒欲耶抱耶怒起
耶欲抱兒兒死矣人生亦徒自苦惡用爾爾亂日荒郊
漠漠白骨一何離離不知吾兒何處悲且啼

惜哉行

惜哉雲中鶴矯矯乘風翔亮音振天表光潔凌秋霜一
朝墮凡想誤入鷺鷥行斂翮獨惆悵羞聞稱鳳凰

二

十年拭一劍用盡華陰土忽然被摧折霜鋒陷如齧既
壘不可合既歟不可補呼水再鑪錘寸心苦復苦

大人奉使代藩期逝未返以詩紀懷

日日還家日如何日日違西風嘶羸騎朔雪點征衣官
路程難定歸途信自稀百方聊慰解心事亂雲飛

二

期在仲冬末過期猶遠遊簡圖稽馬邑指日計蘇州客

路南來近離思北向愁中途遇良友儻此為淹留

三

薄宦本無味徒牽離索情
覲顏知捧玉納手苦懷冰
古驛聽嚴鼓黃昏對短檠
何時卸塵鞵團坐話東征

四

馬首苦風霜遙知憶故鄉
日高牆角煖釀熟甕頭香
歲暮情相昵初歸味倍長
如何困修阻勞我別離腸

五

歲晚天風急啾啾細鳥繁夕陽下歸路危葉集頽垣感
物思千縷抒懷詩數言征車應不遠閣筆倚柴門

六

持錢晨入市欲往問君平霜落開歸計冰深尚遠征對
人多解譬併我不分明試看三吳分何時返使星

七

漫說宦遊好那知作客難晨昏惟逐隊僮僕共盤桓旅
病難形字家書數自看不堪離別况漸欲憎長安

八

再將家報讀十月發京師破惑真無計寬愁但有著始
憑書限日今恃筮為期北雁南來盡歸帆莫更遲

九

外孫新學語試問祖歸不對我每微笑不言頻點頭經
旬皆恨別半晌暫忘憂嬰慧偏多驗門前望客舟

十

匪我關心極其如期逝何日偏歸路短愁與客程多穉

弟幾回望親朋數遍過度來應咫尺尊酒共婆娑

寄贈唐宜之兼呈知非道人

茫茫廿年餘一往圖自快今來始回首逢人盡堪拜拜
罷還致辭不知雙淚滋誰能藥石我沒齒長相思病夫
尋扁鵲片語容自給願子垂諦聽一一陳其私我病膽
力薄我病眼力卑我病骨力脆我病願力雌願力苟不
深扁鵲無可為明知還故縱悠忽不自持情竅苟如此
墮落安足疑感子惠我言忽驚千鈞鉞臨風還再拜千

里如見之

送程子長兼呈魏瓠園先生

一病月餘久坐失春風期青青梧桐葉陰陰桃李枝感
此方嘆息出門邁相知短筇掃古木兼之題新詩古木
蘇家風新詩漾輕漪芒鞋遍山山此去將安之路若經
海寧為謁瓠園師請誦隰桑篇道我遙相思

同唐宜之過楓溪訪卞子厚先生

故人臥窮巷冷然護幽獨入門狹於舟偃蹇數椽屋梅

雨夜來過牀趾秀首霜殘書四五卷石枯毛穎禿敝榻
皮古畫淋漓瀟湘竹中有梅道人斜枝拖半幅迎風勢
掀舞疑入簾簾谷稚子髮散亂聞音解呼六新從武夷
來生小武夷麓問之了不領頻笑眉紋蹙

長水怨

為友人妾賦

妾家住長水長水東西流青青湖畔柳迢迢湖上樓十
三學釵書十四工瑩篴十五臨窻繡精妙世無儔翩翩
少年子窈窕行相求借問樓上女可似羅敷不里嫗前

致辭願君且淹留美人好顏色終日樓上頭兼之臨窻
繡精妙世無儔君子謬垂盼聞言中心喜語我長者行
同聲謂應爾郎君美風度玉樹蒹葭倚十九渡長江聲
名若江水好花不獨榮天生合連理行行隨君去默默
思故里牽帷幾回喚低眉羞欲死臨鏡貼花鈿可憐體無
比紗窻春日午脈脈情何已憶我在家時拈香繡大士
金刀翦素綾瑩瑩白於紙刺成蓮花葉彷彿香風吹香
風吹入夢夢到蓮花池繡痕細難識但覺生蛾眉靜玩

坐逾久忽忽心自疑似曾親見佛不知身是誰綾額尚
餘尺皚皚冰雪姿淡濡碧玉毫邀郎為題詩郎書擬右
軍妾心亦委婉針鋒與筆意曲折隨郎轉繡罷持似君
秀色堪舒卷顧我每微笑妾顏先自醜落地為女子可
憐側室難陡然一回想心事慘不懽雖復蒙君憐鮫
綃恒不乾大婦貴家女妾身臧獲看上堂伺音聲下堂
候顏色含羞入空房惻惻潛相憶雖然潛相憶無用長
太息誠得君子懽不怨長離隔大婦奄逝世一家身獨

當漂蕩若浮萍隨君流四方南都復北都終歲長道傍
黃金散欲盡不思歸故鄉壯志在四海妾心暗悲傷君
怯不勝衣年來益憔悴十日九臥病奄奄滯旅次妾首
如飛蓬并日忘食事上無姑嫜親下無得力婢旋出又
旋入常恐呼不至憂勞填胸臆刺刺肝腸碎歲月漸消
耗妾身亦不支帶圍日趨緩空復存腰肢事君垂十載
不一生男兒羞佩宜男艸悵然心中悲君嘗兩畜婢中
道旋棄之妾身非不容君自輕別離暮春三月盡束裝

謀南歸買舟廬如葉帷幕不得施長夜泊豐州巨蚊攢
冰肌生小長閨閣辛苦實難為入秋弛行李僦人樓上
居小姑家海濱聞之亦來依雖非久居計氣息聊得舒
良人忽生心娶婦支門閭隨珠飾翠幃黃金飾綺疏紅
羅覆斗帳寶馬七香車今日媒妁來東隣有美姝明日
媒妁來西家有西施妾身匪木石焉得不孤悽對鏡影
如削安敢生言辭禮數任頡頏難比先娘時新人入門
來灼灼艷威儀二九頗不足二八頗有餘女伴覩鸞幃

嘖嘖相嗟咨君心愛幸絕迥與舊人殊非必顏色殊新
舊自相渝新人哭亦妍舊人笑不如孤房過慰藉眇眇
聊斯須情知心不存詞說空爾為新昏決旬日忽作南都
遊俗語莫空房挽衣不能留新人整歸寧登車去由由
妾身姊為母同君亦登舟耳綰雙明月墮髻垂金塗飄
颻蕩湘裾艷如安石榴輕盈作纖步翩若雲端游隣女
相擁簇朱顏自生羞十年方得歸一喜還一愁顧君色
悽慘何用心恻恻莫非眷新昏懷此離索憂千喚不一

答默默自低頭舟行到長水妾自還家裏親戚往邀君
君固不肯起詰朝云解維舟中須盤桓勿用再往返各
使中心安恐君途上寒幅巾裁合歡恐君途上饑烘栗
盈朱盤木落霜露急勿使衣裳單千語囑奚兒勸君幸
加餐平明奚兒至顏色驟驚顫向前往叩問淚流先被
面郎君乞致辭此生勿相見十年恩愛深謝卿重依戀
奈卿久專妬會見中情變不如痛割絕免使腸輪轉妾
身得聞之狂頓摧心肝天乎我何辜天乎真無端雖在

夢魂中不料遭棄捐恨無晨風翼迅駛追君船淚珠十
萬斛那得飛君前牽衣一慟哭身死妾亦甘縱然被驅
遣曷不先一言一去永決絕何處鳴煩冤自從入君門
歷今垂十年雖彼難與犬亦當念周旋如何鐵石人一
絕弗復憐椎胸胸血嘔委身赴清水骨肉痛如割僂勉
相救止姊恩父母深我生不如死尚冀南都還重來過
吾里性行吾熟知茲望殆已矣昔年別兩妾我淚揮不
止誰料行及身苦境苦如此嗚呼倉浪天茲恨何日已

新人入我門繡帷長日垂依稀靚容貌猶未通言詞臨
行詳睇視恰在登車時蚤知生死隔揮淚一致辭念與
小姑別淚落如連珠妾初進門來小姑九歲餘探懷索
果餌髮亂呼我梳今來已成婦骨肉情依依長別不一
語腸斷當何如我有兩丫鬟事我五六年大者髮覆額
小者亦比肩晨興聽呼喚夜深候我眠而今永隔別涕
泗紛潺湲平時解思我料爾當亦然掩淚入房來窻前
見針帖殘絲與剩線寸寸皆儂血向日入君目從今長

斷絕委婉隨郎心郎心太曲折忽見大士像不覺淚滂
沱稽首乞慈悲妾身竟如何今生無辜過宿生愆怨多
安得轉君心春風被女蘿君心終不回不如赴長河稽
首乞慈悲再拜涕漣漉不望重聚首但願相見時雨落
不上天一見知何期婦人失夫心百念無可為但願新
人懽為君生男兒更念孱弱身疾苦不相離舊人識君
性新人安得知十年守窮賤心事多苦悲願君振高翮
及時凌風飛妾身長已矣相見知何期一字一鳴咽行

道皆酸悽

簡錢彥林謀阻唐宜之金陵之行

野航去住渾難定似向金陵煙雨中
鳳老何天尋竹實
雁棲隨地傍孤蓬
浮蹤三宿伊無戀
幽緒千層我較濃
半里梅花勞夢想
况堪山水隔重重

二

不惜相隨日數回
武塘曾見幾人來
君逢好友邀吾共
吾有奇懷向友開
此去倘離香樹圃
何年同住藕花隈

天雄歸騎行將近留策應須細細裁

前重九一日送宜之之金陵

不堪寥落對秋風來日登高若箇同雲臥杳沉深谷裏
月明還想小橋東謾言交味禪中淡偶觸愁腸格外濃
別淚欲彈聊復已無端飛出笑聲中

二

楓林霜落暮煙青手折芙蓉贈遠征擬買野舫重話別
恐臨歧路轉傷情片帆習習從今去萬壑深深何處行

悔我追隨羸一載誤將文字友先生

三

把手西風各悵然強憑壯語破纏綿莫言對酒多新恨
譬不逢君自舊年此去好行秋色裏相思半在晚林前
醉中分袂休回首日上梧桐客放船

又賦得遍插茱萸少一人送宜之

九日羣開竹葉觴茱萸傳插動離腸賦詩不少浣花叟
吹帽那尋從事郎坐看孤鴻橫別浦遙憐匹馬亂殘陽

尊前已是蒹葭路莫待臨流嘆渺茫

送唐汧父入四安山

汧父先生久作隣未知汧父是何人
茶甌時畜長生火藥裹常隨不病身
短袴獨鋤三尺圃角巾留掛十年塵
刺船忽向千峰去何處煙波着釣綸

家書

時事紛紛不可詰孤忠耿耿徒離憂
國人爭憤柙中兒之子却憐堂下牛
黃髮廿年浪引領青山萬古仍含羞

彈章三上累膽落風志不遂差堪酬

二

盡言上苑多芳草數去誰者蕙與蘭素性恰並鷗社狎
人間何意蠶叢難天生一副巖林骨羸作數年冷淡官
稚子候門日已久老人歸來且加餐

招錢彥林仲芳兄弟飲

舊愛陶令靜近覺次山好藹如過邨巷籬下逢父老語
樸情逾深古風動懷抱三復不能已念與君共討翩然

攜仲來濁酒足傾倒

茅簷集卷二